



## **Crisis Theologica**

**Cárdenas, Juan de**

**Sevilla, 1687**

Dissertatio XXVI. An liceat imponere falsum crimen alicui, pro defensione  
proprij honoris, aut famæ?

---

[urn:nbn:de:hbz:466:1-75689](https://nbn-resolving.de/urn:nbn:de:hbz:466:1-75689)

mutuatori à mutuatario (improprius  
vtjmur his nominibus, cum præmiū  
non detur pro mutuo, sed pro alijs  
contraictibus, qui admiscentur) sed  
non datis pignoribus à mutuatario,  
dantur pro præmio duodecim pro  
centum: ergo datis pignoribus, non  
possunt dari pro præmio duodecim  
pro centum. Et idem est, cum mu-  
tuarius dat fideiussorem. Quod  
quidem intelligendum est, quando  
constat, pignora esse secura, vel quia  
constat illa non esse aliena; vel si  
aliena sunt, data esse à vero Domi-  
no ad oppignorandum illa. Et simi-  
liter, quando constat fideiussorem  
esse locupletem, quantum sufficit ex  
communi existimatione ad securita-  
tem solutionis.



## DISERTATIO XXVI.

*An liceat imponere falsum cri-  
men alicui, pro defensione  
proprij honoris, aut  
famæ?*

## C A P V T I.

Referuntur duas opiniones dam-  
natæ, & præmittuntur  
aliqua.

## S V M M A R I V M.

*An Caramuel sit Author harum pro-  
positionum damnatarum? num. 2.  
& seqq.*

*Proponitur eius conclusio tradita in  
editione novissima. num. 4.  
Referuntur alij Authores, qui eamdem  
conclusionem tuentur. num. 6.  
Qui Authores dixerint, illud peccatum  
est veniale. num. 7.*

*An damnatio hæc extendatur ad om-  
ne testimonium falsum, etiæ extra-  
iudiciale? num. 8.*

*Quot questiones discutienda sint?  
num. 9.*

1. **P**roposito quadragesima ter-  
tia ex damnatis hæc est:  
*Quid ni, nisi veniale sit, detrahentis  
authoritatem magnam sibi noxiā  
falso crimen elidere?* Et quadrage-  
sima quarta, quæ eiusdem ordinis  
est, ita se habet: *Probabile est, non  
peccare mortaliter, qui imponit fal-  
sum crimen alicui, ut suam iustitiam,  
& honorem defendat. Et si hoc non est  
probabile, vix erit opinio probabilis in  
Theologia.*

2. Hæ propositiones communi-  
ter atribuuntur Caramueli. Et Ama-  
dæus Guimenius, tract. de Charitat.  
prop. 7. num. 3. refert ex Caramu-  
le in Theol. fundam. num. 1151.  
hæc verba [ viginti, & plures Doc-  
tores asserere, eum, qui imponit  
falsum testimonium alicui, ut suam  
iustitiam, & honorem defendat,  
non peccare mortaliter.]

3. Sed in editione Lugdunensi,  
an 1657, qua vtor, aliter discurrit  
Caramuel. Nam fund. 61. num. 1802.  
hanc statuit primam conclusio-  
nem. [Innocens falso accusatus  
non potest crimen imponere falso  
testi, si tale illud sit, quod testimo-  
nium non infirmet; potest autem im-  
ponere tale, quod falsum testimoni-  
um infirmet. Potest, inquam, quin  
peccet contra iustitiam, & teneatur  
ad aliquam restitutionem; quia pec-  
cabit contra veritatem.]

4. Secundam conclusionē sta-  
tuit num. 1823. [Non est possibilis  
casus, in quo innocens falso accusa-  
tus possit sine mortali imponere cri-  
men falso testi, quod eius testimoni-  
um infirmet. Ergo impositio eius-  
modi numquam erit iusta defensio,  
sed semper vel vindicta, vel periu-  
rium.]

PROPOSITIO XXXXIII. & XXXIV. 531.

rium. Quod clarissime ostendo; nam vel Titius per iniuriam apud tribunalia traductus contra accusatorem deponit calumniam cum iuramento, vel sine iuramento: si pri-  
mum, erit periurus; si secundum, non acceptabatur in iudicio eius deposi-  
tio. Ergo quocumque se vertat, reus erit peccat mortaliter: peccabit enim mortaliter, si peieret, & mortali-  
ter etiam, si sine moderamine in-  
culpatæ tutelæ, iniquo testi falsum testimonium imponat. Omitto ipsū mendacium; nam mentiri Reipu-  
blicæ in materia gravi, etiam præ-  
ciso iuramento, est grave pecca-  
tum.

5. Itaque Caramuel, quamvis forte in alia editione affirmaverit eas propositiones dñatas, in hac tam-  
editione Lugdunensi, in qua multa re-  
vocavit, quæ olim tradierat, affirmat,  
cum, qui falso accusatori obijcit cri-  
men falsum, & si ea exceptio pro sit  
ad defensionem falso accusati, pec-  
care mortaliter contra veritatem,  
non tamen contra iustitiam.

6. Et quidem hanc sententiam cum hac præcissione, & distinctione docuerunt non pauci Doctores. Illā enim sic defendit Lugo Card. tom.  
2. de iust. disp. 40. sect. 2. num.  
26. & apud ipsum Bañez, Ioannes de la Cruz, Ledesma, & Orellana.  
Dixit autem Lugo Card., eam opini-  
onem esse speculative probabilem;  
quia cum dicar, esse peccatum mor-  
tale contra alias virtutes, ea opinio  
non pertinet ad proxim, sed ad spe-  
culationem. Ait enim num. 27. [ si-  
militer in nostro casu monuimus, li-  
cet nō peccetur cōtra iustitiā in testē,  
imponendo illi crimen falsum; pec-  
cari tamen contra alias virtutes, &  
quidem peccatur etiam contra iustitiā  
legalem, proponendo accusa-  
tionem falsam, conando decipi iu-  
dicem in illa parte iudicij, condem-

nando testem ob crimen nunquam ab ipso comissum.]

7. Est tamen advertendum, quod aliqui ex Authoribus citatis expressè dixerunt, solum peccare venialiter illum, qui falsum testimonium im-  
posuit contra testem falsum testimo-  
nium dicentem contra illum in iudi-  
cio. Ita teste Diana part. 3. tract. 5. *Diana.*  
resol. 4. Ioannes de la Cruz, in direc-*Cruz.*  
tor. præcept. 8. art. 4. dub. 17. concl. *Bañez.*  
1. sic disserit: [ *Bañez.*, & *Ledesma*,  
cum *Orellana*, probabiliter sentiunt,  
esse solum peccatum *veniale* obij-  
cere testi iniquo crimen falsum, se-  
cluso periurio in obijcente, & testi-  
bus ad hoc inducendis.]

8. Præmittendum etiam est,  
damnationem hanc extendi, non so-  
lum ad testimonium falsum, quod imponitur in iudicio testi iniquo, sed etiam ad testimonium falsum, quod extra iudicium imponitur detrahenti graviter. Nam propositiones damna-  
tæ id non limitant ad testem, neque ad iudicium; loquuntur enim univer-  
saliter de falso testimonio dicto con-  
tra quemlibet infamantem.

9. Ex quibus omnibus quatuor quæstiones resultant. Prima, an sit peccatum mortale imponere crimē falsum testi in iudicio testificanti fal-  
sum; an etiam extra iudicium? Et quomodo opinio negativa subiaceat huic damnationi? Secunda, an sit contra iustitiā, quod testi crimen fal-  
sum testificanti contra Titium in iu-  
dicio, Titius imponat falsum cri-  
men? Et, an opinio docens, id esse peccatum mortale, sed non contra iustitiā, incurrat damnationem? Tertia, an sit contra iustitiā, quod extra iudiciū Titius imponat crimē falsum detrahēti gravissimam famā suam? Et, an opinio docens, id esse peccatum mortale, sed non contra iustitiā, incurrat damnationem? Quarta, an reus falso accusatus de gra-

## 532. DISERTATIO XXVI. CAP. II.

vi criminis, possit manifestare delictum occultum accusatoris, vel testis; præcipue si id non possit probare? Et, an opinio docens, id esse licitum, subiaceat huic damnationi? Quartum singulæ per singula capita discutientur.

## C A P V T II.

*An sit mortale, si quis in iudicio, vel extra, falso infamatus, imponat crimen falsum infamatori; & quomodo opinio negativa subiaceat damnationi?*

## SVMMARIVM.

Certum est, quod falso accusatus peccat mortaliter, imponendo crimen falsum actori, vel testi num. 10.

Prima probatio per dilemma. num. 11.

Defenditur dilemma ab obiectione Lumbierij. num. 12.

Secunda probatio ex eo, quod numquam est licitum dicere falsum. num. 13.

Falso infamatus extrajudicialiter, peccat mortaliter imponendo crimen falsum datactori. num. 15.

Ea impositio falsi criminis non est defensio, sed vindicta privata. num. 16. & seqq.

Doctrina opposita subiacet damnationi. nnn. 19.

Colligitur ex propositione 44, non esse reprobata sententiam de sequenda opinione minus probabili. n. 20.

10. **S**It prima conclusio. Certum est, & indubitatum, Titium peccare mortaliter, si in iudicio, falso accusatus, imponit falsum crimen accusatori, vel testi. Hanc propug-

nant melioris notæ Doctores, P. Molina tom. 5. de iust. tract. 4. disp. 24. num. 2. P. Thomas Sanchez tom. 2. Consil. lib. 6. cap. 5. dub. 20. num. 4. Lugo Card. tom. 2 de iust disp. 40. lect. 2. num. 25. Caramuel cap. præced. relatus, & quam plures alij. Et hæc est expressa sententia S. Thomæ 2.2. quæst. 69. art. 2., vbi proponit eam quætionem, *Virū accusato liceat caluminiose se defendere?* Et inter alia responderet: *Falsitatem tamen propone-re in nullo casu licet alicui.* Quod mira claritate prosequitur, & ex contextu patet loqui de culpa gravi.

11. Probatur primo ex Lugo Lugo. Cardinali. [Quia vel deservit ad defensionem, vel non? Si non deservit, erit infamatio iniusta proximi sine necessitate, vel utilitate: si deservit, hoc erit probando illam per testes, qui cum debeant iurare, committent peccatum periurij, & per consequens eos ad hochortari, erit peccatum mortale.] Hoc eodem argumento vtitur Caramuel verbis relatis supra cap. præced.

12. Hoc argumentum putat esse inefficax Lumbier in expositione propositionum 43. & 44. num. 1918. Obicit enim, quod ad minuendam authoritatem infamatoris sufficit simplex affirmatio extrajudicialis. Sed in hoc perperam discurrit: nam vel loquitur de reo infamato in iudicio, vel de infamato extra iudicium? Si de hoc secundo loquitur, non est ad rem; quia præfati Authores, qui id argumentum efformant, loquuntur de reo, qui in iudicio accusatur falso de crimen gravi. Si vero loquitur de infamato in iudicio, negat evidentiā. Ut enim minuat authoritatem accusatoris, aut testis, ne sibi noceat; nihil profundit ea, quæ extrajudicialiter profert.

13. Probatur secundo ex S. Thoma.

*S. Thom.* **ma.** *Falsitatem proponere in nullo casu licet;* atque adeo semper est peccatum dicere falsum; & si sit in materia gravi, est peccatum grave: sed imponere crimen falsum testi iniquo, est dicere falsum in materia gravi: ergo imponere crimen falsum testi iniquo est peccatum grave. Et quidem ego non percipio; quomodo in mendacio sit materia levius, imponere crimen falsum gravissimum.

14. Probatur etiam alijs argumentis, quibus probabimus alias conclusiones statuendas; quae non minus militant pro hac, quam pro illis conclusionibus.

15. Sit secunda conclusio. Si extra iudicium Titio imponatur erimen falsum, peccat mortaliter Titius, si crimen grave imponat detractori, etiam praetextu minuendi autoritatem detractoris, & detractionis. Pro hac assertione stant ijdem Authores, qui pro prima. Et probatur primo ea argumentatione secunda proposita pro prima conclusione. Semper enim est peccatum mortale mentiri in re gravi.

16. Probatur secundo. Haec enim falsa criminis impositio non est defensio, sed vindicta privata, quae numquam licet: ergo est peccatum lethale. Antecedens probatur. Nam vt licita sit defensio, debet esse cum moderamine inculpatæ tutelæ; sed hoc moderamen non inventur in praesenti casu: ergo ea non est defensio licita. Maior est evidens.

17. Et minor probatur. Nam ad moderamen inculpatæ tutelæ requiritur, quod constet evidenter, illud esse medium efficax ad defensionem, & illud esse vnicum; ideò enim ei, qui videt adversarium irruentem gladio districto, licet occidere cum moderamine inculpatæ

tutelæ, quia videt evidenter, id esse medium efficax, & vnicum defendendi se, & evadendi mortem: sed ubi quis patitur calumniam extra iudicium, non est medium efficax ad sui defensionem, imponere crimen falsum calumniatori; nam plerumque contingit, quod eiusmodi publicationem criminis attribuant audientes vindictæ, iracundiæ, seu furori hominis patientis detractionem; ideoque credant illi, qui prius detraxit famam alterius; imo vero censentes, quod ille novum crimen falsi testimonij patrat, inde colligant, verum esse prius delictum, quod asseveravit detractor ille primus: ergo haec secunda criminis impositio falsa non est defensio cum moderamine inculpatæ tutelæ.

18. Sed neque id est medium vnicum ad sui defensionem: plerumque enim suppetunt multa alia media ad indagandam veritatem; nam, ut fert Hispani sermonis proloquium *La verdad adelgaza, pero no quiebra,* id est [veritas extenuatur, sed non infringitur.]

19. Sit tertia conclusio. Doctrina opposita his duabus conclusionibus incurit hanc damnationem. Patet ex ipso contextu propositionum damnatarum, quae cum sint vniuersales, comprehendunt falsam criminis impositionem, tam quae fit in iudicio, quam quae extra.

20. Et obiter notandum est, & ex illo termino propositionis 44. *Probabile est*, inferendum non esse reprobatam à Romana Cathedra sententiam de sequenda opinione minus probabili à quolibet privato homine, & extera materiam valoris Sacramentorum. Namdum Pontifex damnat eam propositionem 44. *Probabile est, non peccare mortaliter* &c. non solum damnat eum, qui dixerit, id esse probabilius, sed etiam eum,

eum, qui dixerit esse probabile, licet minus probabile: si autem reprobata esset sententia de minus probabili opinione seligenda ad praxim, non esset necesse damnare eam propositionem, quæ dixerit esse probabile, licet minus probabile: nam eo ipso quod diceret esse minus probabile, diceret id esse reprobatum.

21. Confirmatur. Ideò enim Pontifex reprobat propositionem afferentem, id esse probabile, licet minus probabile; quia id admittere ad probabilitatem, præiudicat veritati quoad praxim; non autem præiudicaret, si reprobata esset à Romana Cathedra minor probabilitas opinionis quoad praxim. Et de hoc punto latius egi in 3. part. Cris. Theol. disp. 56. cap. 12. per totum.

## CAPVT III.

*An sit contra iustitiam, quod in iudicio testi iniquo reus imponat falsum crimen; & opinio negativa subiicitur huc damnationi?*

## SYMMARIVM.

*Quæstio loquitur de impositione falsi criminis, quod testem reddit inhabilem ad testificationem. num. 22.*

*Contra iustitiam peccat reus, qui imponit tale crimen actori, vel testi. num. 23.*

*Peccat contra ius Rēpublica. num. 24.*

*Item contra ius privatum testis iniqui. num. 25.*

*Mendacium infamatorum non habet rationem inculpæ tutelæ. num. 26.*

*Non se defendit cum moderamine inculpæ tutelæ, si sit cum præiudicio Rēpublica. num. 27.*

*Idem ostenditur à paritate defensionis occisivæ infamatoris. num. 28.*

*Numquam est licitum defendere se per falsitatem. num. 29.*

*An peccet contra iustitiam, qui per mendacium recuperat rem suam ab iniusto possessore. num. 31. & seqq.*

*Quod nam sit discrimin in defensione inter vitam, & famam? num. 32. & seqq.*

*Quod sit discrimin in defensione inter ablationem rei temporalis, & ablationem fame. num. 34. & seqq.*

*Opinio docens, illum reum peccare mortaliter, sed non contra iustitiam, non subiicit huic damnationi. num. 36. & seqq.*

22. **V** Idimus cap. 1., plures esse Doctores, qui tueantur, eiusmodi reum imponentem falsum crimen testi iniquo non peccare contra iustitiam; ex quibus aliqui affirmant, adhuc peccare mortaliter contra alias virtutes; aliqui vero, peccare dumtaxat venialiter. Et hoc ultimum falsum esse, & expresse damnatum ab Innocentio XI. constat ex cap. præced. Quare inquirimus in præsenti, an supposito quod talis reus peccet mortaliter, peccatum eius sit contra iustitiam? Supponimus autem, crimen, quod falso imponit reus testi iniquo, esse ex illis, quæ testem reddent inhabilem ad testificationem. Nam si sit ex alijs criminibus, apud omnes constat, illum peccare contra iustitiam; cum id non prosit ad propriam defensionem, sed solum ad vindictam privatam.

23. Prima conclusio. Peccat contra iustitiam reus, qui in iudicio imponit

## PROPOSITIO XXXIII. & XXXIV.

535

imponit falsum crimen testi iniquo. S. Thom.  
Hæc est expreßa sententia S. Thomæ. Nam 2. 2. præscribit quæstioni 69. hunc titulum: *De peccatis, quæ sunt contra iustitiam*. Et mox art. 2. prescribit hunc: *Vtrum accusato li- ceat calumniose se defendere?* In corpore autem ait: *Falsitatem tamen proponere, in nullo caſu licet alicui.* Et mox: *Neque etiam aliquem dolū, vel fraudem adhibere: quia fraus, & dolus vim mendacij habent.* Et hoc est *calumnoſe se defendere*. Ex quibus patet, vt in iudicio fraude, dolo, aut calumnia, esse contra iustitiam.

Molina.  
Sotus.  
Tapia. Pro eadem conlusione pugnant P. Molina tom. 5, de iust. quæst. 24. num. 2. Sotus lib. 5. de Iust. quæst. 9. art vlt. Illustriss. Tapia tom. 2. Cat. mor. lib. 5. quæst. 12. art. 7. num. 3. attentis ijs. quæ docet ibid. quæst. 14. art 10. num. 3. & plures alii.

24. Et primo quidem esse contra ius, & iustitiam Reipublicæ, sive contra iustitiam legalem, quæ respicit ius Communitatis, sive Reipublicæ (quod non negat Lugo Card. supra citatus) probatur. Respublica enim habet ius, ne vlo modo decipiatur in ijs, quæ pertinent ad rectam gubernationem: violat ergo ius Reipublicæ, qui in iudicio crimen falsum obiicit accusatori, vel testi; facit enim, quod iudicium publicum erret censendo dignum poena, eum, qui non est illa dignus. Sive (vt difserit Lugo cit.) peccatur etiam contra iustitiam legalem, proponendo accusationem falsam, conando decipi iudicem in illa parte iudicij, condemnando testimoni ob crimen numquam ab ipso commissum.

25. Deinde esse etiam contra iustitiam privatam testis, probatur. Etenim testis habet ius strictum, ne infameretur crimine falso; sicut habet ius, ne ab aliquo privato occidatur, aut vulneretur. Et sicut habens ius ad

vitam, non amittit illud, nisi vbi vrget defensio alterius cum moderamine inculpatæ tutelæ; ita ius, ne infameretur, non amittitur, nisi vbi vrget ius defensionis alterius cum moderamine inculpatæ tutelæ: sed reus imponens falsum crimen testi iniquo non se defendit cum moderamine inculpatæ tutelæ: ergo in hoc casu reus retinet ius suum, ne falso infameretur; atque adeò si falso infamatur, violatur ius illius, & committitur iniustitia. Maior est evidens.

26. Probatur minor primo ex Tapia Petro de Tapia proxime cit. *Nam mendacium infamatorum non est medium proportionatum ad defensionem cù moderamine inculpatæ tutelæ.* quæ sunt verba doctoris. Non enim potest esse inculpata tutela mendaciū adeò grave.

27. Probatur secundo eadem Minor. Nemo enim defendit vitam suam cum moderamine inculpatæ tutelæ, si se defendit cum præiudicio Reipublicæ, sive violando ius Reipublicæ: sed reus, qui defendit se, imponendo crimen falsum testi iniquo, violat ius Reipublicæ, vt constat ex proxime dictis in prima parte huius conclusionis: ergo reus in hoc casu non se defendit cum moderamine inculpatæ tutelæ. Et ideò P. Lessius Leff. de iust. cap. 9. dubit. 12. num. 82. optime dixit: *In iure defensionis semper considerandum, ne usus in perniciem Reipublicæ vergat.*

28. Probatur tertio. Nam vt ostendi difserit 21. cap. 2. art. 2., ideo defensio occulta infamoris non fit cum moderamine inculpatæ tutelæ, quia talis defensio est in perniciē, & contra ius Reipublicæ, & contra ius illius, eo ipso quod sit contra iustitiam legalem: ergo talis defensio non retinet moderamen inculpatæ tutelæ.

29. Probatur quarto ex S. Thom. Quia

S. Thom

*Quia falsitatem proponere in nullo casu licet alicui: Sed defendere se cum moderamine inculpatæ est licitum: ergo defendere se cum moderamine inculpatæ tutelæ, numquam est licitum per falsitatem. Deficiente ergo iure defensionis cum moderamine culpatae tutelæ, manet integrum ius ad famam in teste iniquo; atque adeò reus peccat contra tale ius, & consequenter contra iustitiam.*

Lugo.

30. Obijcit primo Lugo Card. vbi sup. Licet mendacium sit intrinsece malum, non tamen peccat contra iustitiam, qui dolo, & mendacijs recuperat rem suam ab iniusto possessore: ergo neque peccat contra iustitiam, qui recuperat dolo, & mendacio suam famam ab iniquo teste violatam.

31. Respondeo distinguendo antecedens: non peccat contra iustitiam, [ si dolus ipse per se non sit contra ius iniusti possessoris, ] concedo, [ si sit contra ius illius, ] nego. Itaque si velit recuperare rem suam infamando iniustum possessorum, aut accusando illum in iudicio de crimen falso, peccat contra iustitiam quo ad infamationem, aut accusationem falsam; non vero contra iustitiam recuperando rem suam.

32. Obijcit secundo. Qui dolo, & mendacijs deciperet iniustum invasorem vitæ suæ, vt caderet in foveam, vel in fluvium, vt hac ratione se ab illo liberaret, non peccaret contra iustitiam; esset enim defensio cū moderamine inculpatæ tutelæ: ergo etiam in præsenti casu non erit contra iustitiam propter eamdem rationem.

33. Respondeo eodem modo, distinguendo similiter duplex ius in vasoris, aliud ad vitam, aliud ad famam: in eo ergo casu in vasor amitteret ius ad vitam, urgente iure alterius ad defensionem cum moderamine incul-

patae tutelæ; sed nō propterea amitteret ius ad famam. Si ergo in ivatus deduceret invasorem ad foveam, vel flumen per mendacia, quibus non laderetur ius ad famam, nullum ius invasoris violaretur: non ius ad famam, quia ea mendacia non sunt contra famam; non ius ad vitam, quia amisit invasor illud ius, urgente iure ad defensionem cum moderamine. In nostro autē casu violatur ius ad famam; quia ille reus non se defendit cum moderamine inculpatæ tutelæ, vt probayimus.

34. Obijcit terrio. Non est contra iustitiam, si ego auferam viëtum, vel lædam segetem illius, qui iniuste me lædit, quando id est medium, vt faciam, illū abstinere a mea læsione: ergo non est contra iustitiam lædere famam eius, qui meā iniuste lædit, vt sic me liberem ab eius læsione in me.

35. Respondeo similiter, illum amittere ius ad conservationem sui viëtus, aut segetis, quando instat ius defensionis meæ cum moderamine inculpatæ tutelæ; sicut contingit in casu, qui proponitur in antecedenti. In altero autem casu testis inquis non amittit ius ad famam suam; quia in reo non invenitur defensio cum moderamine inculpatæ tutelæ per id medium infamationis, vt probatum est.

36. Secunda conclusio. Illà opinio, quæ docer, peccare mortaliter reum imponendo falso crimen telliti iniquo; sed non peccare contra ius privatum illius testis, non subiacet huic damnationi. Patet. Nam hoc decretum damnat solum propositionem, quæ negat, id esse peccatum mortale: sed præfata opinio non negat, id esse peccatum mortale; quin potius id experesse affirmat: ergo hoc decretum non damnat præfamat opinionem.

Con-

37. Confirmatur. Nam hæc damnatio non habet ullum verbum, vnde colligatur, illud peccatum mortale esse potius contra iustitiam, quam contra aliam virtutem: ergo dummodo afferatur esse peccatum mortale, non subiectum damnationi opinio docens, id non esse contra iustitiam.

## C A P V T IV.

*An peccat contra iustitiam, qui extra iudicium imponit falsum crimen ei, qui sibi graviter detrahit? Et an opinio negativa subiaceat damnationi?*

## S V M M A R I V M.

*Peccat contra iustitiam, qui extra iudicitaliter imponit falsum crimen mendaci detractori. num. 39.*

*Non exercetur defensio iusta per impositionem falsi criminis. num. 40. & seqq.*

*Propositio docens non esse contra iustitiam eam impositionem falsi criminis, non subiaceat huic damnationi. num. 43.*

38. **V**Idimus cap. 2. peccare læthaliter eum, qui in iudicio, vel extra iudicium infamat falso infamatorem suum; & cap. 3. peccare læthaliter contra iustitiam eum, qui in iudicio imponit falsum crimen testi iniquo. Restat modo inquirere, an delinquit etiam contra iustitiam is, qui falso crimen imponit infamatori suo mendaci; eo prætextu ductus, ut imminuens autoritatem sui infamatoris, defendat se ab illa infamia, qua illum in-

vrit. Authores, qui negant, hoc peccatum esse contra iustitiam, quando patratur in iudicio, quoꝝ retuli cap. præced., illud negant etiam extra iudicium.

39. Prima assertio. Peccat læthaliter contra iustitiam, qui extra iudicium imponit falsum crimen mendaci infamatori suo. Hanc assertionē propugnant Sotus, Molina,  
Sotus.  
& Tapia relati cap. præced. Et ibi-  
Molina.  
dem conſtat, hanc eamdem esse men-  
Tapia.  
tem S. Thomæ.

40. Probatur ex principijs supra præictis. Etenim detractor ille prior, sicut quilibet alius, habet ius strictum ad famam suam; & illud non amittit, nisi vbi adfuerit in alio ius defensionis cum moderamine inculpatæ tutelæ: sed infamatus ab illo non habet ius ad defensionem suam cū moderamine inculpatæ tutelæ exercendam per impositionem falsi criminis: ergo prior ille detractor non amittit in eo caſu ius ad famam; & consequenter si infamatus ab illo delinquit contra famam eius, peccat contra ius eius, atque adeo contra iustitiam.

41. Probatur minor, primo eodem modo, atque cap. 2. concl. 2. Nam vt detur moderamen inculpatæ tutelæ, requiritur, quod se defensio cognoscat evidenter, illud medium esse efficax, & vincum ad suam defensionem; infamatus detractione alterius non potest cognoscere evidenter, impositionem falsi criminis esse medium efficax ad suam defensionem, cum plerumque accidat, non inde recuperari suam famam, imo vero inde quandoque deteriorari; credunt enim homines, infectum esse illo crimen eum, qui habet lingua audaciam: ergo ille non habet ius ad sui defensionem cum moderamine inculpatæ tutelæ per eam falsi criminis impositionem. Sed neque

Y y y

id

id est medium unicum suæ defensionis; cum sint alia media, quæ adhibere potest ad indagandam veritatem,

*S. Thom.* 42. Confirmatur eadem minor ex doctrina relata S. Thomæ. *Nam falsitatem proponere in nullo casu licet*: Sed defendere se cum moderamine inculpatæ tutelæ est licitum: ergo defendere se cum moderamine inculpatæ tutelæ in nullo casu sit per falsitatem.

43. Secunda assertio. Propositione, quæ docet peccare lethaleriter eum, qui imponit crimen falsum suo intamatori, non peccare contra iustitiam, sed contra alias virtutes, non subiicitur hic damnationi. Ratio est eadem, ac ea, quam instruxi pro secunda conclusione capit. 3.

### C A P V T V.

*An reus falso accusatus possit manifestare crimen occultum sui accusatoris, aut testis?*

### SVMMARIVM.

*Ratio dubitandi à paritate imponendi falsum crimen ad manifestationem criminis occulti. num. 44. & seqq.*  
Peccat reus contra iustitiam, quando manifestatio criminis est inutilis ad defensionem. num. 47. seqq.

*Quando manifestatio delicti occulti est necessaria ad defensionem Rei, licita est. num. 48.*

*Nisi parvum immineat damnum reo, testi autem magnum. num. 49.*

*Quomodo hæc opinio non subiaceat huic damnationi. num. 50.*

*Quomodo manifestatio delicti occulti habeat paritatem, & disparitatem respectu impositionis criminis falsi. num. 51.*

*Quomodo ex manifestatione occulti criminis non inferatur impositio falsi. num. 52.*

*Quæ diversitas sit quoad hoc inter crimen occultum, & secretum. num. 53.*

*Et quid si reus sciat illud, quia testis sibi manifestavit causa petendi cōsiliij? num. 54.*

*Et quid si per iniuriam cognovit reus eiusmodi delictum? num. 55.*

44. Hæc quæstio similis est præcedentibus. Et ratio dubitandi est: est enim par, aut suppar delictum, detrahere proximo, manifestando crimen grave occultum illus; ac imponendo illi falsum crimen: sed reo non licet defendere se imponendo falsum crimen testi iniquo: ergo neque licet defendere se, manifestando delictum occultum testis iniqui.

45. Deinde quamvis hæc propositiones damnatae solum loquuntur de impositione falsi criminis, atque adeò sententia de imponendo falso crimine solum damnetur expresse; videtur tamen hæc altera de manifestando crimine occulto testis, virtualiter condemnari. Etenim virtualiter damnatur propositio, quoties hæc est antecedens, vnde evidentia infertur propositio damnata, ut si prius demonstravimus in superioribus; sed ex hac propositione, quod reo liceat defendere se manifestando crimen occultum testis iniqui, colligitur evidenter propositio damnata, quod liceat defendere se imponendo falsum crimen testi iniquo; cum par, aut suppar sit vtrumque: ergo virtualiter damnatur præfata propositio.

46. Dico primo. Si manifestatio eius delicti est inutilis ad defensionem rei, peccat reus contra iustitiam manifestando delictum testis. Ita com-

*Tho San.*  
*Lugo.*  
*Molina.*

communiter Theologi. Videantur  
P. Thomas Sanchez tom. 2. Consi-  
lior. lib. 6. cap. 5. dub. 23. Lugo  
Card. tom. de iust. disp. 40. sect. 2.  
num. 22. & præcipue P. Molina tom.  
5. de iust. disp. 43. num. 3. Varijs au-  
tem modis potest esse inutilis ad de-  
fensionem rei ea manifestatio. Pri-  
mo, si crimen manifestandum non est  
ex illis, quæ testem reddunt inhabi-  
lem ad testificandum. Secundo, si  
reus id crimen non possit probare:  
nam sine probatione nihil prodest  
ad defensionem rei. Tertio, si sit  
alia via, per quam possit se defendere,  
sine manifestatione eius delicti occulti.

47. Ratio est manifesta: quia  
sola causa defensionis potest iustifi-  
care propalationem delicti eius tes-  
tis: ergo vbi non est ratio defensio-  
nis, integrum manet ius iustitiae,  
quod habet testis ad suam famam  
conservandam.

48. Dico secundo. Quando  
hæc manifestatio delicti occulti ne-  
cessaria est ad defensionem rei, li-  
citem est reo facere eam manifesta-  
tionem. Ita Doctores proxime cita-  
ti. Ratio est: quia si ei non sit alia  
via se defendendi, hæc est iusta  
defensio; & quando in iudicio  
pugnat contra reum, cedit iure  
suo, quantum necesse est, vt re-  
us se defendat. Quod adeò verum  
est, vt Lugo Card. citatus afferens  
Sotum, Malderum, & Bañezium,  
dicat esse probabile, quod potest  
manifestare delictum occultum tes-  
tis, non solum quando testis dicit  
falsum, sed etiam quando testatur  
verum. Et argumentum eius vrget.  
Nam testis, qui habet illum defectū,  
licet occultum, inhabilis est ad testi-  
ficandum; reus ergo ius habet exclu-  
dendi à sua causa testes inhabiles; &  
ne sua causa decidatur, nisi per testes  
habiles.

49. Limitant Doctores hanc

*Lugo.*  
*Sotus.*  
*Mold.*  
*Bañez.*

assertionem in casu, quo parvum  
damnum immineat reo, testi autem  
maximum. Tunc enim peccat læ-  
thaliter reus, saltem contra charita-  
tem, si in tali hypothesi manifestet  
tale delictum occultum testis.

50. Et exdictis patet, hanc sen-  
tentiam, de manifestatione occulti  
delicti testificantis, non includi sub  
hac damnatione, neque formaliter,  
neque virtualiter. Non formaliter;  
quia damnatio non loquitur expre-  
sse, nisi de eo, qui falsum testimonium  
dicit. Non virtualiter; quia hæc  
sententia de manifestando occulto  
crimine testis non est antecedens, vnde  
inferatur evidenter opinio, quod  
reus potest imponere falsum crimen  
testi iniquo.

51. Ad rationem dubitandi ini-  
tio huius capituli propositam respon-  
deo, detractionem proximi, ma-  
nifestando delictum occultum illius,  
sine iure defensionis iusta esse suppa-  
rem delicto imponendi falsum cri-  
men alicui; non vero, quando ma-  
nifestatur delictum occultum ab ha-  
bente ius iusta defensionis, modo  
dicto; hoc enim modo non est delictum  
ea manifestatio.

52. Ad argumentationem, quæ  
subiungitur, nego eā propositionem  
de manifestando occulto crimine  
testis, esse antecedens, vnde inferatur  
probabiliter, ne dum evidenter, pro-  
positio, de imponendo falso crimine.  
Ad probationem constat exdictis,  
qua ratione non sit delictum, ma-  
nifestare crimen occultum testis,  
propter ius defensionis iusta; at-  
que adeò non potest esse delictum  
suppar.

53. Sed ne ingens oriatur æqui-  
vocatio, præmonere oportet, dixi-  
se nos, posse reum defendere se ma-  
nifestando crimen *occultum* testis, sed  
non dixisse crimen *secretum*: est enim  
inter hæc magna diversitas. Et primo

V y 2      qui-

quidem difficultas est, an reus possit manifestare delictum testis, quod sibi commissum est ex fide secreti cum pacto de cœlando. Et quidem eiusmodi pactum de secreto cœlando est iniquum, v.g. Si eius secretum vergat in damnum grave Reipublicæ, aut tertij. Tunc enim pactum non obligat, etiam si iuramento firmetur: quia iuramentum non est vinculum iniquitatis. Si tamen tale sit pactum, ut licet possit servari, illud obligat iure naturali. Et ideo reus non potest se defendere manifestando delictum occultum testis, quod sub pacto tenet cœlare, nisi circumstantiae aliquæ concurrant, quæ pactum reddant irritum.

54. Secundo, si reus sciat illud delictum, quia illud sibi manifestaverat testis causa petendi consilij; strictius obligatur reus ad cœlandum, non solum ex pacto tacito, quod intervenit in petitione Consilij; sed quia ipsa necessitas petendi consilium facit pactum esse strictioris obligationis. Quod adeò verum est, ut etiam in Religione, in qua Religiosi cedunt iure suo, ut manifestentur superiori eorum defectus ab eo, qui extra confessionem eos noverit, P. Suarez tom. 4. de Religione, tract. 10. lib. 10. cap. 7. num. 23. dixerit, hoc statutum non extendi ad illa, quæ subditi: *Secreto, & Consilij petendi gratia, ut dirigantur, vel inventur, alteri communicaverint.* In tali ergo hypothesi reus non habet ius manifestandi delictum testis; atque adeò peccabit contra iustitiam, si illud manifestet.

55. Tertio, cum per iniuriam cognovit reus eiusmodi delictum, iure naturali tenetur ad illud cœlandum, v. g. Si contra ius illius aperuit litteras ab illo, vel ad illum missas, & illis cognovit delictum eius. Qua-

re delictum sic cognitum per iniuria, non potest reus manifestare pro sui defensione; neque enim habet ius ad talēm defensionem: quod si manifestet, erit detractio læthaliter culpabilis. De his strictis obligacionibus secreti videantur Sotus lib. de secreto membr. 3. quæst. 4. P. Molina to 5. de iust. tract. 4., disp. 3.4. & 5. P. Thomas Sanch. tom. 2. Consil. lib. 6. cap 6. P. Lessius de iust. cap. 11. dub. 8. & 9. P. Georgius Gobatus tom. 3. tract. 5. cap. 19. sect. 10. & 11. & plures apud ipsos.



## DISERTATIO XXVII.

*An inficiatur Simonie labe, qui dat temporale pro spirituali, solum tamquam motivum, vel tamquam gratuitam compensationem? Et quid, si tempora-  
le sit principale motivum,  
imo & finis rei spi-  
ritualis conse-  
quenda?*

## C A P V T I.

Referuntur propositiones dam-  
natae, & premittuntur  
aliqua.

## SYMMARIVM.

*Definitio Simonie, ex S. Thoma.  
num. 3.*

*Quid intelligatur nomine emptionis,  
& venditionis, ex S. Thoma. nu. 4.  
Major eius rei explicatio, ex S. Thoma.  
& S. Bonaventura. num. 5.*

Dm-